

163<sup>a</sup> MARINI SANUTI LEONARDI FILII DE SUCCESSU ITALIÆ  
LIBER XXVIII INCIPIT FELICITER, DUCANTE LEONARDO  
LAUREDANO DUCE VENETIARUM SERENISSIMO, INCI-  
PIENTE PRIMO OCTOBRI MDXX.

Volendo cussi le fatal disposition, quale ci mo-  
veno per il voler di lo eterno Dio, che, ancora ch'io  
sia di età di anni 55, debi continuar la mia historia  
per forma di diaria, sì per voler seguir la promessa  
fata al Serenissimo Principe nostro, che *domente* el  
viverà, se Dio mi darà vita, ne farò nota de ogni oc-  
curentia ch'è seguita non solamente in la cità nostra  
et Italia, ma *etiam* per tutto il mondo, secondo li  
avisi che per giornata se intenderà; et essendo stato  
questo anno passato per influentia de' cieli e sorte  
cattiva mia fuora dil Senato, non però ho mancato di  
scriver cotidianamente ogni successo; et al presente  
eri ne l'excelentissimo Mazor Consejo rimasi di la  
Zonta ordinaria, per gratia di quelli che volse fusse  
asumpto nel numero di senatori, ai qual et a la patria  
mia ho eternamente et immortal ubligatione; però con  
più facilità potrò meglio intender et scriver le oc-  
curentie che per giornata achaderano, servando il mio  
pristino instituto. E sarà il vigesimo octavo libro  
principiato, pregando lo immenso Iddio lo possi com-  
pir con ben et honor di questa excelentissima e cri-  
stianissima Republicha, et andar seguendo per molti  
anni l'opera con vita dil Serenissimo Principe no-  
stro et eterna mia memoria a la posterità.

*A dà primo aduncha dil mese di Octubrio,*  
introno in Colegio li Capi di XL nuovi: sier Alvise  
da cha' da Pexaro qu. sier Fantin, stato zà molti  
anni, et sier Zacaria Bondimier qu. sier Girolamo, et  
sier Alvise Basadona qu. sier Alvise; et Cai dil Con-  
sejo di X, sier Alvise Malipiero, sier Zorzi Pixani  
dotor et cavalier et sier Domenego Contarini, tutti  
tre stati altre fiate. Savi dil Consejo, sier Antonio  
Grimani procurator, sier Piero Capelo et sier An-  
drea Trivixan el cavalier; restano sier Zorzi Corner  
el cavalier procurator, sier Francesco Bragadin, et  
sier Luca Trun *licet* sia rimaso consier. Intrò savio  
a Terra ferma sier Marco Foscare, l'altro eletto sier  
Piero Contarini è andato fuora per 8 zorni con li-  
centia dil Principe, resta sier Valerio Marzelo, sier  
Francesco Morexini et sier Tomà Mocenigo. Introno  
tre Savii ai ordeni, sier Marin Justinian, stato altre  
163<sup>a</sup> fiate, sier Marco Antonio Corner et sier Lorenzo

Bembo nuovi. Sier Zuan Francesco Mocenigo non  
introe per esser morta la madre di so padre que-  
sta note, et sier Vincenzo Diedo non pol provar la  
etade.

Et vene *letere di Cipri, di 2 Avosto*, qual non  
fo lete, ma se intese la morte vera di sier Anzolo  
Malipiero consolo nostro a Damasco, qu. sier To-  
maxo, a di . . . et la mojer di sier Bortolamio da  
Mosto capitano di Famagosta.

Et essendo reduta la Quarantia criminal per  
placitar alcuni rei, vene inhibition di preti; per il che  
sier Nicolò Bernardo el consier, sier Francesco da  
cha' da Pexaro et sier Lorenzo Bragadin avogadori  
di Comun, con tutti li XL andono in camera dil Se-  
renissimo, per dolersi di tante inhibition vien fate  
quando li rei si vol placitar in el Consejo predito, sì  
per il Legato, come per il Patriarcha et episcopo  
Foscarini di Città nuova, *adeo* non si provedendo,  
non si pol far justitia. Per il che il Serenissimo disse  
ozi nel Consejo di X si parleria, et fata la Zonta, si  
faria provisione per non esser cosse da suportar, et  
*maxime* si fa bole false et non vere.

Da poi disnar, fo Consejo di X *semplice*. Et feno  
Cassier per mexi quatro, justa il solito, sier Alvise  
Malipiero, el Cao di X, per scurtinio. *Item* li scurti-  
nii per far 15 di la Zonta, i qual fono questi.

*Li quindici di la Zonta dil Consejo di X.*

Sier Andrea Gritti procurator.  
Sier Zorzi Corner el cavalier procurator.  
Sier Antonio Trun procurator.  
Sier Domenego Trivixan el cavalier procurator.  
Sier Zorzi Emo procurator.  
Sier Domenego Benedeto, fo consier, qu. sier Piero.  
Sier Francesco Bragadin, savio dil Consejo, qu. sier  
Alexandro procurator.  
Sier Michiel Da Leze, fo Cao dil Consejo di X, qu.  
sier Donado.  
Sier Antonio Zustignan el dotor, savio dil Consejo,  
qu. sier Polo.  
Sier Michiel Salamon, fo consier, qu. sier Nicolò.  
Sier Polo Capelo el cavalier, fo savio dil Consejo,  
qu. sier Vetur.  
Sier Andrea Baxadona, fo consier, qu. sier Filippo.  
Sier Marco Orio, fu duca in Candia, qu. sier Piero.  
Sier Benedeto Gabriel, fo provedador a le biave, qu.  
sier Alvise.  
Sier Valerio Valier, fo provedador al Sal, qu. sier  
Antonio.

(1) La carta 162<sup>a</sup> è bianca.